

TRANTER UMENS

da Chatrina Josty

« Déjeuner en paix »

Stephan Eicher chanta: «Déjeuner en paix». Quai n'è betg be ina buna chanzun, quai è mes nov inimi persunal. E mes giavisch il pli fervent. Déjeuner en paix. Quai na para numnadamain betg pussaivel en mia wg.

Il di dad ina studenta cumenza magari pli tard che quel dad in che lavura, quai savain nus, tuttina era il di dad ina studenta ha da cumenzar enendretg. Mes di cumenza enendretg sche jau poss baiver in caffè. Baiver in caffè en paus. Cun mes caffè e cun mes paus la damaun vi jau esser suletta, stoss jau esser suletta. Ma esser in pau sulet en cuschina la damaun è in pau difficil en mia wg.

Perquai sa schluitesch jau mintga damaun en cuschina cun la speranza dad esser l'emprima là e da pudair baiver mes caffè en paus. Ma savens na vai ditg e Markus vegn era en cuschina. (Adina gia tratg en tiptop. Er quai ina da quellas chaussas. Mes caffè baiv jau en pigiama e sche insatgi ma vul per mort e fin far cumpagnia duai er el avoir en in pigiama, bitte sehr!) Markus è in flot. Ed igl è fitg flot da discutir cun el, nus savain discutir uras ed uras e quai lura anc sur da temas interessants. Dapi divers mais lavura el vi da sia lavur da licenziat. El ha studegià medias e schurnalissem ed istorgia. El sa bler e discutta gugent sur da quai ch'el sa e ch'el ha chattà or cun sia lavur. Quai è gea flot. Ma betg la damaun cur che jau vi mo baiver mes caffè en paus! Cur ch'el vegn la damaun mintgamai en cuschina e cumenza cun sias grondiusas teorias sur da la recepziun e la gelenkte aufnahme wirkung mediale r unterbewussteinssteuerung e Herta Sturm qua e Herta Sturm là, sa sbassa mia luna per in pèr grads. Jau vi doch mo mes paus! Ma perquai che jau n'hai lura insumma betg veglia da discurre e da discutir na di jau era betg a Markus, che jau preferiss ensasez mo la cumpagnia da mes caffè. Ma uschia na po quai betg ir vinavant. Jau stoss ussa propi ponderar, sco comunichar che jau na support gnanc small talk la damaun, che jau vi simplamain déjeuner en paix. Damaun al serv jau mes inimi d'ensolver: «Markus, taidla ina giada, questa super chanzun da Stephan Eicher. Ella ha num Déjeuner en paix.» Forsa che quai funcziuna.

Tranter umens - La nova columnna en las Punts. Chatrina Josty, studenta a Fribourg scriva da sia vita en ina WG cun dus umens